

# TAMAN BOTANI DIRAJA SYDNEY

Teks dan foto: Muhammad Haji Salleh (Sasterawan Negara)

Australia terletak jauh dari benua lain, oleh sebab itu negara ini terpisah daripada sejarah geologi dan biologi benua ini. Demikianlah sewaktu berjalan-jalan di Taman Botani Diraja Sydney, kita akan cepat merasakan bahawa banyak daripada pohon-pohon dan bunga-bungaannya unik dan endemik yang hanya terdapat di sini.

Saya pepadat alam yang hijau, subur dan unik. Maka itu, taman botani ini ialah tempat pelepas rindu saya. 45 tahun yang lalu, saya dianugerahkan Asian Artists Visit oleh Kerajaan Australia di bawah Whitlam. Pada kesempatan itu, buat pertama kali saya memasuki taman ini, tetapi masa yang terbatas juga membataskan pengalaman saya.

## Sepaliti Sejarah

Taman ini didirikan pada tahun 1816 dan yang pertama pula di Australia. Keluasannya ialah 158 ekar, dan terletak di tepi pelabuhan dan selat yang indah. Pemandangannya luar biasa;



Pada kulit ada tanda waktu.

di sebelah selatannya ialah pelabuhan Sydney dan Opera House, sementara ke utara ialah sudut belakang kota itu. Menurut sejarahnya, inilah juga kawasan suci suku Asli Cadigal daripada



Beberapa pokok seperti pokok pudak, bogak, pinang dan pandan yang kita kenali.

kumpulan negeri Eora Nation.

Apabila kita memasukinya, bunyi kota pun hampir terhenti, dan simen serta batanya berlindung di belakang tembok alam yang hijau, indah dan mengasyikkan.

Saya suka kepada Taman Botani di Kuala Lumpur yang indah dan juga Taiping serta Pulau Pinang. Di England, saya ke Kew dan di Berlin ke Berlin Botanical Garden and Botanical Museum. Di New York, Central Park menjadi salah satu pengalaman yang indah.

Kini, di Sydney, saya menerima sebuah hadiah alam yang luar biasa yang tidak saya alami di negara-negara lainnya, terutama sewaktu taman ini merayakan usia 200 tahunnya. Untuk ke sana, kita hanya perlu berjalan kaki di tepi tembok Opera House, di pinggir Farm Cove, di sebelah timur kawasan pusat perniagaan Sydney, dan dibentangkan di tepi tebing pelabuhan yang bergelombang rendah. Dari puncak taman ini, kita seterusnya dihadihkan pemandangan Sydney Harbour yang panoramik.



*Acacia longifolia*.

**Taman ini didirikan pada tahun 1816 dan yang pertama pula di Australia. Keluasannya ialah 158 ekar, dan terletak di tepi pelabuhan dan selat yang indah. Pemandangannya luar biasa; di sebelah selatannya ialah pelabuhan Sydney dan Opera House, sementara ke utara ialah sudut belakang kota itu.**

Di bawah, pohon-pohon terbentang jalan setapak, bangku daripada batu pasir yang diukir oleh banduan pada tahun 1811 untuk isteri gabenor pada ketika itu! Dari "kerusi" inilah kita ditawarkan beberapa pemandangan terbaik pelabuhannya. Kawasan yang dikhaskan untuk taman adalah kira-kira sepertiga daripada ukuran seluruhnya. Keluasan ini merangkumi kawasan rumput yang luas dengan pokok-pokok besar yang memberikan teduhan pada musim panas. Orang Sydney yang bekerja di bangunan pejabat bandar menggunakan kebun ini semasa waktu rehat dan makan tengah hari mereka.

Taman Botani Diraja Sydney mempunyai lebih satu juta spesimen tumbuhan, malah ada kereta api *hop-on hop-off* yang merah comel untuk pengunjung berkeliling bagi yang kurang bertenaga. Lawatan ke Taman Botani Diraja Sydney ini tidak dikenakan bayaran.



Penyambut tetamu.

### Ahli Botani Pengumpul Awal

Dua orang ahli botani, Banks dan Solander, mengumpul spesimen di berbagai-bagai kawasan daerah Teluk Botani ini. Yang menariknya, sebahagian daripada yang dikumpulkan mereka, iaitu sekitar 200 tahun yang lalu, masih tumbuh subur di taman ini.



Taman Botani Diraja Sydney mempunyai lebih satu juta spesimen tumbuhan.



Burung kakak tua dan bunga.


Antara spesimen tersebut termasuklah *Woolisia pungens*, *Actinotus helianthi*, (Flannel Flower) dan *Angophora costata* (The Sydney Red Gum). Di Malaysia, kita lebih mengenali akasia yang tumbuh di mana-mana daripada bibit Australianya, malah di rumah saya juga. Di Australia, pohon "gum", iaitu sejenis gelam, paling hadir dan kelihatan di mana-mana. Di sebelah selatan kota ada sebidang hutan pohon gelam ini yang mengelupas kulitnya pada hujung musim panas. Di Indonesia, inilah pohon yang memberikan kita minyak kayu putih. Namun begitu, pohon ini sangat merbahaya pada musim panas pada waktu hutan sering terbakar kerana kandungan minyaknya itu. Api pembakaran besar-besaran yang berlaku di Indonesia sebahagiannya ialah sumbangan minyak ini juga.



Pandanus atau pudak tua.

Di Lower Gardens, atau Taman Bawah, tumbuh hampir semuanya pohon-pohon asal di daerah ini dan beberapa kawasan lainnya. Pohon besar ditanam agak jauh sedikit daripada lorong pejalan kaki, tetapi di tepinya ialah berbagai-bagai rumput, pohon renek, buluh, pohon semi-padang pasir dan tumbuhan rawa, teratai serta kiambang. Di tepi lorong juga kita disalami oleh bunga-bunga.

Pada masa ini musim bunga sewaktu biji sudah menjadi, dan juga bermakna musim kenduri untuk burung-burung di sekitar taman. Berbagai-bagai burung agak riuh memakannya. Ada seekor burung yang menyerupai burung kakak tua yang mematak



Usia pada batang dan dahan pohon tua.


bijinya tanpa mempedulikan manusia yang lewat di lorong depan mereka. Burungnya seindah bunga yang dipatuknya. Di kawasan lain, di dekat lorong pejalan kaki, ada mengkudu Australia yang berbuah pada pohon yang tidak begitu tinggi.

Sebahagian lagi memperkenalkan kita kepada beberapa jenis buluh hijau dan kuning. Kebanyakannya jenis tropika yang tumbuh rapat-rapat, tidak seperti buluh benua utara. Oleh sebab Australia mempunyai bahagian-bahagian yang agak kontang, maka tumbuhan semi-padang pasir cukup banyak dipamerkan.

Di tengah-tengah taman terdapat sebuah kolam yang tidak terlalu besar. Inilah jantung simbolik kepada kawasan ini. Sementara di sekitarnya di tanam pohon jenis lili. Di tengah-tengah tasiknya ialah sebuah pulau yang ditumbuhi berbagai-bagai palma dan juga jenis lainnya. Di bahagian lain, kolam

**Taman Botani Diraja Sydney mempunyai lebih satu juta spesimen tumbuhan, malah ada kereta api *hop-on hop-off* yang merah comel untuk pengunjung berkeliling bagi yang kurang bertenaga. Lawatan ke Taman Botani Diraja Sydney ini tidak dikenakan bayaran.**

teratai dan tunjung tumbuh gemuk dan subur, penuh di atas air. Oak dan beringin tumbuh besar sering memperlihatkan usianya pada dahan dan belitannya. Saya terpegun melihat kulit



Palma dan kaktus.



Seroja subur di kolam.

pohon ini, bukan sahaja menunjukkan teksturnya yang luar biasa, tetapi juga usianya yang tidak kurang daripada 200 tahun itu. Ada cukup banyak pohon tua dengan kulit berkedutnya! Sebatang pudak (pandanus) yang juga cukup tua berdiri seperti kipas di kejauhan. Semua ini membuat kita berasa kecil di bumi yang luas dan harus dikongsi oleh jutaan spesies.

Di suatu kawasan lainnya ada pula yang khusus kepada jenis-jenis pohon kaktus dan sebangsa dengannya. Bagi yang suka bunga-bunga, banyak pula ros dan pisang-pisang, yang berbagai-bagai warnanya, daripada kuning kepada merah tua ke ungu. Di bahagian lain ada juga sebuah Taman Palma yang indah dan sejuk.

**Dua orang ahli botani, Banks dan Solander, mengumpul spesimen di berbagai-bagai kawasan daerah Teluk Botani ini. Yang menariknya, sebahagian daripada yang dikumpulkan mereka, iaitu sekitar 200 tahun yang lalu, masih tumbuh subur di taman ini.**



Daun atau bunga?

Ada syarikat pelancongan yang dapat membawa kita mengelilingi tanah asal orang asli di sini, tetapi kami mulanya hanya ingin bersiar-siar sahaja dan memilih untuk hanya memasuki suatu dunia hijau yang ternyata sangat menakjubkan.

Sementara pohon-pohon diperkenalkan kepada kita dalam bentuk asalnya, di Lion Gate Lodge ada ruang yang cukup besar untuk hasil seni yang berhubungan dengan tumbuh-tumbuhan dalam bentuk lukisan, cetakan dan foto dan pahatan.

\*\*\*

Demikianlah pada suatu petang hari saya berkenduri keindahan alam tumbuh-tumbuhan. Pohon-pohon cepat membantu kita keluar daripada jasad dan akal dan mengajak kita memberikan perhatian kepada dunianya yang sangat menakjubkan, dalam keragaman jenisnya, bentuknya dan warnanya.

Ada keindahan di sana yang sangat berlainan daripada apa-apa yang biasa kita perhatikan di sekitar rumah, pejabat dan kehidupan kita. Pohon-pohon ini membantu mengimbangkan diri dalaman dan pengalaman kita. Yang pastinya, ada terapi dan penawar untuk semua yang bersiar-bersiar atau berjalan di sana. Kita ditenangkan, dihijaukan dan diindahkannya mata pemandangan yang melihat semua ini.